

AS PRIORIDADES DO ECOLOXISMO EN 2007

XXXII ASEMBLEA XERAL DE ADEGA

BELÉN RODRÍGUEZ

ADEGA trasladouse ao Teatro García Borbón de Vigo para celebrar a súa XXXII Asemblea Xeral o pasado 28 e 29 abril. O saneamento das rías, a protección dos espazos da rede natura e do litoral, a xestión dos residuos, o cambio climático, e a política forestal centraron o debate ecoloxista. Asimesmo, ADEGA renovou a Xunta Directiva con mudanzas e novas incorporacións, de tal forma que Virxinia Rodríguez pasa a ser a nova Secretaría Xeral de ADEGA.

Un dos focos de atención na XXXII Asemblea Xeral de ADEGA foi a Rede Natura. Neste eido, faise preciso consolidar a Rede de Custodia dos espazos de RN creada pola asociación e explicar o valor ambiental dos lugares protexidos, dando a coñecer as súas potencialidades para que a poboación local participe na súa xestión. Concretamente, considerouse a posibilidade de solicitar ás administracións públicas unha moratoria para as canteiras a ceo aberto por ser, actualmente, unha das actividades industriais máis perigosas para o patrimonio ambiental e xeolóxico dos espazos protexidos.

A xestión dos refugalloos en Galiza centrou outra das mesas de discusión. Ante as dúbidas xeradas pola Xunta arredor do futuro modelo de xestión dos residuos do sur de Galiza, en Carballeda de Avia, os ecoloxistas defenden a aposta por un modelo baseado na redución, reutilización e reciclaxe dos refugalloos, onde prime a compostaxe e a descentralización sobre outros tratamentos

insostibéis e centralizados. ADEGA opoñerá-se a unha SOGAMA bis no Sur.

Con respecto ao cambio climático avógase por un maior esforzo na redución de emisións das empresas contaminantes, pola potenciación do uso do transporte colectivo e o pulo decidido dos camiños de ferro. ADEGA promete manter o seu compromiso no seguemento e control das novas instalacións enerxéticas en Galiza (eólicas e hidroeléctricas) e das novas formas de enerxía limpa (biocombustibéis e biomasa).

No terreo lexislativo, a asociación reivindicará a derogación da polémica modificación da lei de Costas aprobada polo

Partido Popular en 2002, por permitir excesos urbanísticos contra a protección do litoral. Tamén reclamará a aplicación estrita dunha moratoria urbanística mentres non se estableza unha política seria de ordenación territorial na costa. Vixiará moi de preto os novos Planos e Leis promulgados pola Xunta de Galiza en materia costeira (Plano Acuicola), enerxética (Plano Eólico), e forestal (Lei de Montes). No eido rural, os ecoloxistas solicitarán a redacción dun novo Plano Forestal fundamentado na defensa e potenciación dos bosques autóctonos, e no referido aos incendios forestais, a asociación seguirá apoiando o voluntariado en defensa do monte galego.

NON MÁIS RECHEOS NA RÍA

O acto acolleu a membros da Plataforma pola Defensa da Ría de Vigo que na conferencia inaugural repasaron con detalle as desfeitas ambientais sufridas na ría nos últimos dez anos. Eloy Piñeiro e Miguel Anxo Rúas, máximos representantes de PDRV, fixeron unha descrición desalentadora sobre a situación de saneamento, a contaminación e a especulación urbanística que ameaza o estuario.

Ampliacións de peiraos, a construción de novos portos deportivos, a realización de dragados de grande impacto, macrorrecheos e vertidos directos ao mar, fan da ría viguesa a máis castigada de toda Galiza, e de Bouzas o lugar máis agredido de toda a ría, sinala a PDRV. Ali, a Autoridade Portuaria de Vigo prevé a ampliación dun recheo de 223.000 m², máis unha depuradora e un segundo recheo de 62.000 m², o que crearía un gravísimo impacto ambiental e un estreitamento considerábel da ría. Este proxecto preténdese levar a cabo sen un Estudo de Impacto Ambiental, nin o Plano de Usos Portuarios, nin o Plano Director de Infraestruturas, nin a Modificación do Plano Especial da Ría de Vigo.

A PDRV cre que a emerxencia coa que se está a impulsar o macrorrecheo de Bouzas responde á necesidade de darlle servizo aos petroleiros que transporten materia prima para a futura planta de biocombustibéis de Salvaterra. Estes petroleiros, ademais de precisar de alomenos 20 metros de calado, constituirán unha ameaza continua de contaminación para o litoral vigués, apunta Eloy Piñeiro. Así pois, PDRV demanda ás instancias competenciales "non máis recheos na ría", unha análise seria do saneamento de Vigo e un estudo global e integral da ría. ADEGA fixo extensíbel esta petición de avaliación e estudo para o resto das rías galegas.

MUDANZAS E NOVAS INCORPORACIÓNS NA DIRECTIVA DE ADEGA

(ver Cerna nº 40, páx. 18)

Daniel López Vispo	Vicepresidente
Virxinia Rodríguez	Secretaría Xeral
Xan Louzao	Tesoureiro
Luis Díaz Cabanela	Vogal de Saúde ambiental e Residuos
Branca Villares Naveira	Vogal de Voluntariado Ambiental
Oscar Lama	Vogal de Montes
Xosé Xesús Oca Ben	Vogal de Relacións Sociais
Xosé Luis Blanco Suárez	Vogal de recursos audiovisuais
Xosé Manuel Rodríguez	Vogal de Afiliación
Xesús López Piñeiro	Membro da Permanente

